

საქართველოს მთავრობის

დადგენილება №23

2013 წლის 7 თებერვალი

ქ. თბილისი

საქართველოს სახელმწიფო ბიუჯეტით გათვალისწინებული საქართველოს რეგიონებში განსახორციელებელი პროექტების ფონდიდან დასაფინანსებელი ადგილობრივი თვითმმართველობის და რეგიონული პროექტების შერჩევის პროცედურების და კრიტერიუმების დამტკიცების შესახებ

მუხლი 1

„საქართველოს მთავრობის სტრუქტურის, უფლებამოსილებისა და საქმიანობის წესის შესახებ“ საქართველოს კანონის მე-5 მუხლის „ე“, „კ“ და „ნ“ ქვეპუნქტების შესაბამისად, დამტკიცდეს თანდართული „საქართველოს სახელმწიფო ბიუჯეტით გათვალისწინებული საქართველოს რეგიონებში განსახორციელებელი პროექტების ფონდიდან დასაფინანსებელი ადგილობრივი თვითმმართველობის და რეგიონული პროექტების შერჩევის პროცედურები და კრიტერიუმები“.

მუხლი 2

ამ დადგენილებით განსაზღვრული შერჩევის პროცედურებისა და კრიტერიუმების შესაბამისად, ადგილობრივი თვითმმართველობისა და რეგიონული პროექტების განსახორციელებლად გამოსაყოფი თანხის მთლიანი მოცულობა განისაზღვრება საქართველოს მთავრობის გადაწყვეტილებით, წლიური სახელმწიფო ბიუჯეტით საქართველოს რეგიონებში განსახორციელებელი პროექტების ფონდისათვის გათვალისწინებული ასიგნებების ფარგლებში.

მუხლი 3

ამ დადგენილების მე-2 მუხლის შესაბამისად საქართველოს მთავრობის მიერ განსაზღვრული თანხის ფარგლებში დასაფინანსებელი ადგილობრივი თვითმმართველობის და რეგიონული პროექტი უნდა აკმაყოფილებდეს ამ დადგენილებით დამტკიცებულ კრიტერიუმებს და წარდგენილი და განხილული უნდა იქნეს ამ დადგენილებით დამტკიცებული პროცედურების შესაბამისად.

მუხლი 4

დადგენილება ამოქმედდეს გამოქვეყნებისთანავე.

პრემიერ-მინისტრი

ბიძინა ივანიშვილი

საქართველოს სახელმწიფო ბიუჯეტით გათვალისწინებული საქართველოს რეგიონებში განსახორციელებელი პროექტების ფონდიდან დასაფინანსებელი ადგილობრივი თვითმმართველობის და რეგიონული პროექტების შერჩევის პროცედურები და კრიტერიუმები

მუხლი 1

1. საქართველოს სახელმწიფო ბიუჯეტით გათვალისწინებული საქართველოს რეგიონებში განსახორციელებელი პროექტების ფონდიდან (შემდგომში - ფონდი) ადგილობრივი თვითმმართველობის და რეგიონული პროექტების (შემდგომში პროექტი) განსახორციელებლად საჭირო სახსრების გამჭვირვალედ და ეფექტიანად გამოყენების, ადგილობრივი და რეგიონული პრობლემების წარმოჩენისა და გადაწყვეტისას თვითმმართველობის ორგანოებისა და მოსახლეობის მათხმადური ჩართულობის უზრუნველსაყოფად, ამ დადგენილებით ისაზღვრება პროექტების შერჩევის პროცედურები და კრიტერიუმები.

2. ამ მუხლის პირველი პუნქტით გათვალისწინებული პროექტები მოიცავს რეგიონებში გზების, მიწისქვეშა კომუნიკაციების, ბორდიურების, ტროტუარების მოწყობა-რეაბილიტაციას; წყალგაყვანილობას, წყალ-



არინებას; ხიდების რეაბილიტაციას; გარე განათების მოწყობა-რეაბილიტაციას; სასმელი წყლის ჭაბურღილების და სისტემების მოწყობას; საკანალიზაციო სისტემების და მყარი ნარჩენების მართვას; საცხოვრებელი და საჯარო შენობების შეკეთებას/რეაბილიტაციას და სხვა ინფრასტრუქტურულ, აგრეთვე თვითმმართველობისა და რეგიონული განვითარებისთვის საჭირო პროექტებს.

3. ამ დადგენილების მიზნებისათვის პროექტი რეგიონულად განიხილება იმ შემთხვევაში, როდესაც პროექტის განხორციელების არეალი ან მისი განხორციელებიდან მიღებული შედეგი მოიცავს ორ ან მეტ თვითმმართველ ერთეულს.

4. დასაშვებია ფონდიდან დასაფინანსებელი პროექტის თანადაფინანსება კანონმდებლობით გათვალისწინებული და ნებადართული სახსრებით.

მუხლი 2

1. ფონდიდან დასაფინანსებელი ადგილობრივი თვითმმართველობის და რეგიონული პროექტების შერჩევა მოიცავს შემდეგ პროცედურებს:

ა) ფონდიდან დასაფინანსებელი პროექტის თაობაზე საპროექტო წინადადებას ამზადებს და საქართველოს რეგიონული განვითარებისა და ინფრასტრუქტურის სამინისტროს (შემდგომში - სამინისტრო) წარუდგენს თვითმმართველი ერთეული (ადგილობრივი თვითმმართველობის პროექტების შემთხვევაში) ან სახელმწიფო რწმუნებული - გუბერნატორი (რეგიონული პროექტების შემთხვევაში) ამ დადგენილებით დამტკიცებული შერჩევის პროცედურებისა და კრიტერიუმების შესაბამისად (დანართი №1);

ბ) ამ დადგენილებით განსაზღვრული პროექტების ინიცირება იწყება საპროექტო წინადადების მოწონების თაობაზე საკრებულოს გადაწყვეტილების, ხოლო რეგიონული პროექტების შემთხვევაში - საკრებულოების გადაწყვეტილების შემდეგ;

გ) რეგიონული პროექტების მომზადებასა და ინიცირებაზე უფლებამოსილია სახელმწიფო რწმუნებული - გუბერნატორი ამ მუხლის პირველი პუნქტის „ბ“ ქვეპუნქტით გათვალისწინებული წესის დაცვით;

დ) სამინისტრო შეისწავლის წარმოდგენილ საპროექტო წინადადებას და ამ დადგენილებით დამტკიცებულ კრიტერიუმებთან მისი შესაბამისობის შემთხვევაში, განსახილველად წარუდგენს საქართველოს რეგიონული განვითარების სამთავრობო კომისიას (შემდგომში კომისია), რომლის უფლებამოსილება დადგენილია „საქართველოს რეგიონული განვითარების სამთავრობო კომისიის დებულების დამტკიცების შესახებ“ საქართველოს მთავრობის 2010 წლის 28 სექტემბრის N 297 დადგენილებით;

ე) საპროექტო წინადადებაზე კომისიის დადებითი რეკომენდაციის შემთხვევაში, სრული საპროექტო დოკუმენტაციის (შემდგომში - საპროექტო დოკუმენტაცია) მოსამზადებლად საჭირო ხარჯების დაფინანსებისათვის საქართველოს ფინანსთა სამინისტრო, შესაბამისი წლის სახელმწიფო ბიუჯეტის კანონით დადგენილი პროცედურის დაცვით, საქართველოს მთავრობას წარუდგენს განკარგულების პროექტს ფონდიდან აღნიშნული ხარჯების დასაფინანსებლად თვითმმართველი ერთეულებისათვის ან/და სახელმწიფო რწმუნებულის - გუბერნატორისათვის თანხის გამოყოფის თაობაზე. შესაძლებელია საპროექტო დოკუმენტაციის მომზადებისათვის საჭირო ხარჯების დაფინანსება განხორციელდეს ადგილობრივი თვითმმართველი ერთეულის ბიუჯეტიდან;

ვ) ამ მუხლის პირველი პუნქტის „ე“ ქვეპუნქტის საფუძველზე მიღებული საქართველოს მთავრობის შესაბამისი გადაწყვეტილების ამოქმედებიდან ორი თვის ვადაში (დასაბუთებული აუცილებლობის შემთხვევაში შესაძლებელია მოხდეს ამ ვადის გადაწევა სამინისტროსთან შეთანხმებით) შესაბამისი თვითმმართველი ერთეული ან/და სახელმწიფო რწმუნებული - გუბერნატორი ამზადებს საპროექტო დოკუმენტაციას და დანართი №2-ით გათვალისწინებულ ინფორმაციასთან ერთად წარუდგენს სამინისტროს;

ზ) სამინისტრო, ამ მუხლის პირველი პუნქტის „ვ“ ქვეპუნქტის შესაბამისად, წარდგენილ საპროექტო დოკუმენტაციას და ინფორმაციას განსახილველად წარუდგენს კომისიას;

თ) კომისია უფლებამოსილია არ განიხილოს წარდგენილი საპროექტო დოკუმენტაცია იმ შემთხვევაში, თუ საპროექტო დოკუმენტაციით განსაზღვრული პროექტის სახარჯთაღრიცხვო ღირებულება 10%-ით ან მეტით აღემატება საპროექტო წინადადებით განსაზღვრულ პროექტის სავარაუდო ღირებულებას;

ი) კომისიის მიერ მოწონებული საპროექტო დოკუმენტაცია და დანართი №2-ით გათვალისწინებული ინფორმაცია გადაეცემა სამინისტროს, რომელიც აღნიშნული დოკუმენტაციის საფუძველზე საქართველოს ფინანსთა სამინისტროს წარუდგენს შესაბამისი წინადადებებს პროექტების დაფინანსების თაობაზე.

2. საქართველოს ფინანსთა სამინისტრო, შესაბამისი წლის სახელმწიფო ბიუჯეტის კანონით დადგენილი



პროცედურის დაცვით, საქართველოს მთავრობას წარუდგენს განკარგულების პროექტს ფონდიდან შესაბამისი პროექტის დასაფინანსებლად თვითმმართველი ერთეულისათვის ან სახელმწიფო რწმუნებულის - გუბერნატორისათვის თანხის გამოყოფის თაობაზე.

საქართველოს მთავრობის 2013 წლის 17 მაისის დადგენილება №119 – ვებგვერდი, 21.05.2013წ.

მუხლი 3

საპროექტო წინადადებებისა და საპროექტო დოკუმენტაციის მომზადებისა და შერჩევისას გათვალისწინებულ უნდა იქნეს შემდეგი კრიტერიუმები:

ა) საპროექტო წინადადებისა და საპროექტო დოკუმენტაციის შესაბამისობა კონკრეტული რეგიონის განვითარების სტრატეგიასთან და მოცემული თვითმმართველი ერთეულის განვითარების პროგრამასთან (მათი არსებობის შემთხვევაში);

ბ) ადგილობრივი მოსახლეობის მაქსიმალური ჩართულობა საპროექტო წინადადების შერჩევისა და პროექტის განხორციელების პროცესში;

გ) პროექტის განსახორციელებლად სახელმწიფოს ფინანსური მხარდაჭერის აუცილებლობა;

დ) თვითმმართველი ერთეულის საწარმოო-ეკონომიკური პარამეტრების გაუმჯობესება;

ე) ახალი სამუშაო ადგილების შექმნა;

ვ) ადგილი არა აქვს სხვა ორგანიზაციების პროგრამებსა და აქტივობებთან დუბლირებას;

ზ) მოსახლეობის ხელმისაწვდომობის გაზრდა და ხარისხის ამაღლება ტრანსპორტის, ჯანდაცვის, განათლების, სპორტის, კულტურის, საბინაო-კომუნალური მომსახურების სფეროებში, აგრეთვე მოსახლეობის უსაფრთხო, ეკოლოგიურად ჯანსაღი და კეთილსაიმედო გარემოს უზრუნველყოფა.

მუხლი 4

1. სამინისტრო, მისი დებულებით განსაზღვრული კომპეტენციის ფარგლებში, ახორციელებს მონიტორინგს ამ დადგენილების საფუძველზე შერჩეული და ფონდიდან დაფინანსებული პროექტების მიმდინარეობასა და შესრულებაზე.

2. თვითმმართველი ერთეული და სახელმწიფო რწმუნებული - გუბერნატორი, თითოეული დაფინანსებული პროექტის დასრულებიდან არა უგვიანეს 15 დღის ვადაში, სამინისტროს წარუდგენს ინფორმაციას პროექტის განხორციელების შედეგების შესახებ.

3. სამინისტრო აანალიზებს ამ მუხლის მე-2 პუნქტში აღნიშნულ ინფორმაციას და კომისიას წარუდგენს ანგარიშს განხორციელებული პროექტების თაობაზე წელიწადში ორჯერ - არა უგვიანეს 20 იანვრისა და 20 ივლისისა.

მუხლი 5

1. კომისია ყოველწლიურად უზრუნველყოფს ამ დადგენილებით განსაზღვრული შერჩევის პროცედურებისა და კრიტერიუმების შესაბამისად ადგილობრივი თვითმმართველობისა და რეგიონული პროექტების განსახორციელებლად გამოსაყოფი თანხის ფარგლებში დასაფინანსებელი პროექტების პრიორიტეტული მიმართულებების შესახებ შესაბამისი რეკომენდაციების მომზადებას და წარუდგენს საქართველოს მთავრობას შესათანხმებლად.

2. სამინისტრო უზრუნველყოფს აღნიშნული პრიორიტეტების შესახებ ინფორმაციის მიწოდებას თვითმმართველი ერთეულებისა და ხელმწიფო რწმუნებულებისათვის - გუბერნატორებისათვის.

დანართი №1

საპროექტო წინადადება

თავფურცელი



(გთხოვთ წარმოადგინოთ დაბეჭდილი სახით)

პროექტის წარდგენის თარიღი:

1. ინიციატორი		
(სახელმწიფო რწმუნებული-გუბერნატორი ან თვითმმართველი ერთეულის საკრებულოს თავმჯდომარე)		
1.1	მისამართი:	
1.2	ტელეფონი:	
1.3	ელ. ფოსტა:	
2. საკონტაქტო პირი/ვნება		
2.1	სახელი, გვარი:	
2.2	თანამდებობა:	
2.3	ტელეფონი:	
2.4	ელ. ფოსტა:	
3. პროექტი		
3.1	საპროექტო წინადადების დასახელება:	
3.2	განსახორციელებელი პროექტის მდებარეობა: (თვითმმართველი ერთეული, დასახლება (სოფელი, დაბა, ქალაქი))	
3.3	პროექტის სავარაუდო ღირებულება ლარში (გადასახადების ჩათვლით)	
3.3.1	თანადაფინანსების ოდენობა ლარში და თანადაფინანსების წყარო	
3.3.2	ფონდიდან მოთხოვნილი თანხა ლარში	
4. პროექტის აღწერა		
4.1	პროექტის ზოგადი და კონკრეტული ამოცანები (აღწერეთ პროექტის ზოგადი (ფართო და გრძელვადიანი) და კონკრეტული (მოკლევადიანი და ვიწრო ფოკუსის ამოცანები, რომლებიც ხელს უწყობს ზოგადი ამოცანის მიღწევას) ამოცანები)	
	პროექტის განხორციელების საჭიროების დასაბუთება (მიზეზი, რამაც გამოიწვია პროექტის ინიცირება, გთხოვთ	



4.2	წარმოადგინოთ ფაქტები/ციფრები, რაც გაამყარებს პრობლემის აქტუალურობას, გთხოვთ დააკონკრეტოთ ის ინფრასტრუქტურული საჭიროებები, რომლებმაც განაპირობა წარმოდგენილი პროექტის საჭიროება)	
4.3	გთხოვთ აღწეროთ თქვენ მიერ მოსახლეობასთან ჩატარებული კონსულტაციები (ადგილობრივ მოსახლეობასთან ჩატარებული კონსულტაციების დამადასტურებელი დოკუმენტები: (კრების ოქმები, ფოტო (ვიდეო) მასალა და სხვა), აგრეთვე მაჟორიტარ დეპუტატთან გამართულ კონსულტაციაზე ინფორმაცია (ასეთის არსებობის შემთხვევაში)	
4.4	პროექტის განხორციელების სავარაუდო ვადები	
4.5	მოსარგებლები და მოსალოდნელი შედეგები (გთხოვთ წარმოადგინოთ, რამდენად გრძელვადიანად იქნება პრობლემა გადაჭრილი, მიუთითეთ შედეგები, რაც თქვენი შეფასებით მოყვება პროექტის განხორციელებას)	
4.6	სრული საპროექტო დოკუმენტაციის მომზადების მომსახურების გამარტივებული ელექტრონული ტენდერის მეშვეობით შესყიდვის შემთხვევაში წარმოდგენილ უნდა იქნეს სატენდერო დოკუმენტაცია, ხოლო სრული საპროექტო დოკუმენტაციის მომზადების მომსახურების კონკურსის მეშვეობით შესყიდვის შემთხვევაში წარმოდგენილ უნდა იქნეს კონკურსის მეშვეობით საპროექტო მომსახურების შესყიდვის განცხადება	

სახელმწიფო რწმუნებული-გუბერნატორი ან თვითმმართველი ერთეულის საკრებულოს თავმჯდომარე

ხელმოწერა, ბეჭედი და თარიღი

--	--	--	--



პროექტის დასახე- ლება						შენიშვნა
	სულ	მ.შ. თანადაფინანსება	მ.შ. სრული საპროექტო დოკუმენტაციის მომზადების ფაქტობრივი ღირებულება (ლარი)	დაწყება	დასრულება	
1.	2.	3.	4.	5.	6.	7.

(სახელმწიფო რწმუნებულის-გუბერნატორის ან თვითმმართველი ერთეულის საკრებულოს თავმჯდომარის ხელმოწერა, ბეჭედი და თარიღი).

